

1 JUAN

Jesucristo ded pah ã jumat

¹ Ded pah Jesucristo ã jumatjidih yeebdíh wã naóh daácna caá. Jesucristo biíhmah jumni,* ded pah Dios ã jumatdih naóhni, cãacwã Diosjeéh páantjeh jumat túutnibut ãt jumap wut jĩ. Dios cãacwãdih ded pah ã naáwãtdih Jesúsboó naóh yapani ã jumap jĩ. Æ naáwáchah joinít, jwiítjeh caandíh jwĩ enep jĩ. Jwiít dih ã dáo wáyachah, caandíh jwĩ pej jumap jĩ. ² Jesucristo cãacwãdih páantjeh jumat túutni, nin baácboó ã jũúwát pínah jãtih ã íp Diosjeéh jumni ni nin baácboó ãt cãac jumap tajĩ. Caandíh ennitji bũũ ãih doonãdih yeebdíh wã naóhna caá.* ³ Jwĩ íp Diosjeéh, ã wũúh Jesucristojeéhbut jwĩ táí jumna caá. Pánihna, yeéb jwĩjeéh, jwĩ ípjeéh, ã wũúhjeéhbut ñi táí jumat pínah niijná, jwĩ ennijidih, jwĩ joiníjidihbut yeebdíh wã naóhna caá. ⁴ Bíicdih wẽinit jwĩ jumat pínah niijná, nindih yeebdíh wã daácna caá.

Baabát panhipboó jwĩ jumat

⁵ Dios wũúh jwiít dih ã naóhni ni bohéãtdih bũũ yeebdíh wã naóhna caá. Dios táini yoobát jumna, baabát panihni caá. Dedé yeejat wihcah, dupúát caandíh ã wihcan caá. ⁶ Jwiít yeejép chãjnit, dupúát panhipboó jumna yahna, “Diosjeéh wã táí jumna caá”, niijnít, yeena caá jwĩ chãjap. Dios ã náahat pah jwĩ chãjcan caá. ⁷ Obohjeéhtih,

* **1:1** Jn 1.1,4; 6.68; 1Jn 2.13-14 * **1:2** Jn 1.14,18

túi chãjnit, baabát panihpboó Dios ã jummat pah muntih jwiítbat jumna, ãjeéh jwĩ túi jumna caá. ãihwãjeéhbat jwĩ túi jumna caá. Caandih jwĩ jepahat jíib, Dios ã enechah, ã wũúh Jesucristo cruzboó wun wũhnit, ãih meépjĩh jwiít dih yéejat wihcannit pah ã chãjna caá.

⁸ “Weém bácah yéej chãjni nihcan caá”, niij jenah joinít, yeeatdihjeh jwĩ jenah joiná caá. Páant niij jenah joiná, Dios naáwát dih jwĩ túi jenah joicán caá. ⁹ Obohjeéhtih, jwĩ yéej chãjatdih Diosdih jwĩ naáwáchah, caandih ã quíib bũdbípna caá. “Dios yoobóp dih jumni ã niiját pah ã chãjbipna caá”, jwĩ niij jéihna caá. ¹⁰ “Weém yéej chãjni nihcan caá”, niij jenah joiná, “Dios yeení caá”, niijnít, ã naáwát dih jwĩ náahcan caá.*

2

Jesucristo jwiít dih ded pah ã teo wáacat

¹ Wã weh panihnitá, yeéb yeejép ñi chãjcat pínah niijná, nindih yeebdih wã daác wahna caá.* Obohjeéhtih, jwĩ yéej chãjachah, Jesucristo, yéejat wihcanni, ã íip dih jwiít dih ã naóh teo wáacbipna caá. ² Jwiít yéejnit jwĩ jumuchah, jwĩ yéejat Diosdih ã jáhna caá. Dios bíic dih jwĩ túi jummat pínah niijná, Jesucristo jwiít dih ã wun wũhup jĩ.* Jwiít dihjeh nihcan, nihat baác dih moón jwĩ yéejat dih yohat túut niijná, ã wun wũhup jĩ.

³ Dios ã wutat pah chãjna, “ãjeéh wã túi jumna caá”, jwĩ niij jéihna caá.* ⁴ Obohjeéhtih, bita “Diosjeéh wã túi jumna caá”, niijná yũhna, ã wutat pah

* **1:10** Pr 20.9

* **2:1** Ro 6.11-14

* **2:2** 1Jn 4.10

* **2:3** Jn

14.15,21,23

chãjcan, yeenit caá. Pánih yeenit, Dios naáwátdih ï jéihcan caá. ⁵ Obohjeéhtih, biíhboó ã w̄tat pah chãjni Diosdih ã túi oina caá. Diosjeéh jwĩ túi j̄matdih nin pah jwĩ jéihbipna caá: ⁶ Ded Diosjeéh túi j̄mni Jesucristo ã chãjatji pah m̄ntih caanb̄t ã túi chãjbipna caá.

Jáap w̄tat

⁷ Wã oinitá, yeebdíh b̄m̄ wã daácni jáap w̄tat nihcan caá. Jon jãtíh ñi jéihni w̄tatjeh tigaá. Yeebdíh Jesúih doonádih jwĩ naáwáchah, nin w̄tatdihb̄t ñi joyóp jĩ.* ⁸ Obohjeéhtih, máa w̄tat yuhna, jáap w̄tatb̄t ã j̄mna caá.* Cristo nin w̄tatdih jepahnit, jwiít cãacwãdihb̄t ã oyat tútup jĩ. Dupúát paníhipboó ñi j̄m̄chah, Cristo nin baácna j̄óh̄nit, caán dupúátidih ã baabánap jĩ. Pánihna, ã baabáát paníhipboó j̄m̄nit, Cristo ã oyat tútatdih ñi jepahna caá.

⁹ “Weém baabárboó j̄m̄ni Dios ã w̄tatdih jepahni caá”, niijná yuhna, ã dée paníhni Jesúihdih eníhcan, Dios ã w̄tatdih jepahcan, dupúnarboó j̄m̄ni caá. ¹⁰ Ded ã dée paníhndih oini baabárboó ã j̄m̄na caá. Pánih oina, caandíh dedé b̄m̄gát paníhni ã wihcan caá.* ¹¹ Obohjeéhtih, ded ã dée paníhndih eníhcan, dupúnarboó ã bejna caá. Pánih bejna, jéih encanni paníhni ded pah ã chãjatdih ã jéihcan caá.

Cristodih túi jenah joyát ded pah ã j̄mat

¹² Wébítá, Cristo ã w̄m̄n wãhatjĩh ñi yéej chãjatdih ãt yohop taga. Pánih yéejat yoh̄nit ñi j̄m̄chah,

* **2:7** 2Jn 5-6 * **2:8** Jn 13.34; 15.12 * **2:10** Ro 13.12-14

yeebdíh wã naóh daácna caá. ¹³ Behnitá, yeéb biíhmahjeh jumni Cristodih ñi túi jéihna caá. Caandíh túi jéihnít ñi jumuchah, yeebdíh wã naóh daácna caá. Japatá, yeéb nemépwã ï maáhdih ñit yap yohop taga. Pánih yap yohnit ñi jumuchah, yeebdíh wã naóh daácna caá.

¹⁴ Wébítá, jwí ípdih ñi túi jéihna caá. Caandíh túi jéihnít ñi jumuchah, yeebdíh wã naóh daácna caá. Behnitá, biíhmahjeh jumni Cristodih ñi túi jéihna caá. Caandíh túi jéihnít ñi jumuchah, yeebdíh wã naóh daácna caá. Japatá, Dios naáwát dih túi jepahnit, wêp ñuhnit panihnít ñi jumna caá. Pánih jumnit, nemépwã ï maáhdih ñit yap yohop taga. Páant ñi jumuchah, yeebdíh wã naóh daácna caá.

¹⁵ Diosdih jéihcannit ded pah ï en ñinahatdih ñi en ñinahca bojoó. Ded queét panihni jwí ípdih ã oican caá.* ¹⁶ Diosdih jéihcannit nin pah ï jumna caá: Yeejép chājatdih ï en ñinahna caá. Bií déedih wēi ennít, ï bíbohíh jenah joiná caá. Dawá bií déedih bíbohna, “Weém bita chah túini wã jumna caá”, ï niíj jenah joiná caá. Jwí ípboó páant ã jenah joyát túutcan caá. ¹⁷ Nin baác ã buudúchah, ded pah cáacwã yeejép ï náah jenah joyátbut ã buudbípna caá. Obohjeéhtih, Dios ã náahat pah chājnitboó páantjeh ājeéh ï jumbipna caá.

Yoobópdih naáwát, yee naáwát

¹⁸ Wehá, nin yeó jáapna buudát pínah tóah jūóhna caá ã chājap. “Cristodih tūbit en jūihni ã jumbipna caá”, ï niíjíchah, ñiát joiná jī. Pánihna, buu dawá ï jūúwát dih jéihnít, “Péeni yeó jáap bahnijeh ã judhna caá”, jwí niíj jéihna caá. ¹⁹ Queét Cristodih en

* 2:15 Stg 1.27

jáihnit jwĩ cãtíh jamna yahna, jwiít dih í éemp yoh bacap jí. Páant í bacatdih ennit, Jesúhwã yoobát í nihcatdih jwĩ jéihna caá. Queét áihwã nihna, jwĩjeéh íta chão tágaá. Jwĩjeéh páantjeh í jamachah nihna, Cristodih en jáihnit í jamatdih jwĩta jéihcan tagaá.

²⁰ Obohjeéhtih, yeebdíh Túini Espíritu á jamachah, yeéb nihat Cristoíh dooná yoobóp dih á jamatdih ñi túi jéihna caá.* ²¹ Yeebdíh naóhna, “Queét í túi jéihcan caá”, wã niij jenah joicán caá. Obohjeéhtih, túi jéihnit ñi jamachah, yeebdíh wã naóh daácna caá. Caán dooná dedé yeeat á wihcatdih ñi túi jéihna caá. ²² Nin pah caá yeeni á niijíp: “Jesús Dios á wahni nihcan caá”, á niijná caá. Ded “Jesús Dios wãúh nihcan caá”, niij naóhni Jesucristodih, jwĩ íp Diosdihbut en jáihni caá. ²³ “Dios wãúh Jesús nihcan caá”, niijní jwĩ íp Diosjeéh á túi jamcan caá. Obohjeéhtih, “Jesús Dios wãúh caá”, niijníboó jwĩ ípjeéh á túi jamna caá.

²⁴ Yeéb Jesús dih jwíh jepahnit, ded pah á jamat doonádih ñi joyóp jí. Páant ñi joyátj dih ñi túi náhninaá. Pánih náhninit, Jesús dih, á ípdihbut ñi túi pej jambipna caá. ²⁵ Nin pah Jesús jwiít áihwã dih á niij naáwáp jí: “Yeéb wãjeéh páantjeh ñi túi jambipna caá”, á niijíp jí.

²⁶ Yeebdíh yeenitdih ñi joyáh bojat pínah niijná, wã naóh daácna caá. ²⁷ Jesucristo yeebdíh Túini Espíritudih át wãhup taga. Ñijeéh jamnit, yeebdíh á túi bohéna caá. Yoobóp dih bohéna, yeeatdih á naóhcan caá. Páant á bohénachah, biíh bohénidih

* **2:20** 1Co 2.10-16

ñi náahcan caá. Pánihna, ã bohéatdih joí cádahcan, Cristojeéh páantjeh ñi táí jumúú.

²⁸ Páant tigaá, wehá, Cristojeéh páantjeh ñi táí jumúú. Pánih jumnit, ã jwúub dei júúwúchah, úumcan, ñi tíccan niít. ²⁹ Jesucristo túini ã jummatdih yeéb ñi jéihna caá. Pánih jéihnit, nihat táí chäjnit Dios weh ï jummatdihbut ñi jéihna caá.

3

Dios weh jwĩ jummat

¹ Jwiít dih bainí oican, “Yeéboó wã weh caá”, Dios ã niijná caá. Æ oinit jumna, jwiít ã weh caá. Pánihna, yéej chäjnitboó Diosdih jéihcan, jwiít ã wehdihbut ï jéihcan caá.* ² Wã oinitá, buu Dios weh jwĩ jumna caá. Obohjeéhtih, ded pah jwĩ jummat pínahdih jwĩ táí jéih jwahcan caá. Jesucristo ã jígohochah, caandíh ennit, ded pah ã jummatdih jwĩ táí jéihbipna caá. Pánih jéihnit, caán ã jummat pah muntih, jwiítbut jwĩ jummat pínahdih jwĩ jéihna caá. ³ Det Jesucristo ã jwúub dei júúwát pínahdih pãinitboó yéej chäj cádahnit, ã táí chäjat pah muntih ï túut nuumná caá.

⁴ Nihat yéej chäjnit Dios ã wútatdih yap yohnit caá. Dedé yéej chäjat Dios ã wútatdih yap yohat ã jumna caá. ⁵ Cãacwã ï yéej chäjatdih yohni pínah Cristo ã cãac jummatdih ñi jéihna caá. Caánboodíh yéejat wihcan caá.* ⁶ Ded Cristo biíc dih jumni páantjeh ã yéej chäjca bojo naáh. Obohjeéhtih, ded yéej chäj cádahcan, Cristodih jéihcan, ãih nihcan caá. ⁷ Wã oinitá, yeebdíh yeenitdih ñi joyáh bojoó. Nihat táí chäjnit Jesucristo yoobópdih ã

* **3:1** Jn 1.12 * **3:5** Jn 1.29

jumat pah muntih, queébtut yoobópdih ñ juma caá.
 8 Obohjeéhtih, yéej chājniboó nemépwā ñ maáih ã juma caá. Nemépwā ñ maáh bácah, biíhmahjeh yeejép chājni caá. Páant ã chājatdih yoh beedani pínah Dios wūh nin baácboó át cãac jumap tajī.*

9 Det Dios weh juma, jwī íp Dios ã jenah joyát pah queétdihbut át jenah joyát túutap taga. Pánih jenah joinít, ã wēpat íjeéh ã jumachah, páantjeh ñ yéej chājcan niít. 10 Nin pah Dios weh, nemépwā ñ maáh wehbut ñ jumatdih ñi jéihbipna caá: Túi chājcanit, ñ déewādih oicannit Dios weh nihcan caá. Nemépwā ñ maáh weh ñ juma caá.

Jesúhwā ñ míc oyat

11 Yeéb Jesucristodih jwíih jepahnit, “Míc oyat caá náahap”, jwī niíj bohéatdih ñi joyóp jī.* 12 Caín ã jumatji pah ñi jumca bojoó. Caán nemépwā ñ maáih juma, ã úuddih át mao yohop wat jī. ¿Dépanih tigaá ã úuddih át mao yohji? ñi jenah joyóchah. Caandih yeebdih wā naóhbipna caá. Caín yéej chājni juma, ã úudboó túi chājni ã jumatdih íjnit, caandih át mao yohop wat jī.*

13 Páant tigaá yéej chājnitboó yeebdih ñ eníhcan caá. Pánihna, ñ en jūihñachah, “¿Dépanih tigaá weemdih ñ en jūih?” ñi niíj jenah joicá bojoó. 14 Yeejép chājnit, iiguípna bejnit pínah jwī jumap yuh jī. Obohjeéhtih, buu jeáboó bejnit pínah juma, túiniboodih túut nūmná caá jwī chājap. Jesúhwādih oina, jwiítidih ã túut nūmátidih jwī jéihna caá. Ded cãacwādih oicanni iiguípna bejni pínah ã juma caá.* 15 Ded ã déedih eníhcan, mao

* 3:8 He 2.14-15 * 3:11 Jn 13.34; 15.12 * 3:12 Gn 4.8 * 3:14 Jn 5.24

yohíhat jenah joyát caá caandíh ã jum̃ap. Pánih jum̃na, Dios ã enechah, cãacdih mao yohni bíc yoobó ã jum̃na caá. “Ded mao yohni Diosjeéh páantjeh ã jum̃can níit”, ñi níj jéihna caá. ¹⁶ Ded pah oyat ã jum̃atdih nin pah jwĩ jéihna caá: Jwiít dih búdí oina, Diosjeéh páantjeh jwĩ jum̃at pínah níijná, Jesucristo jwiít dih ã w̃an w̃uh̃ap jĩ. Páant ã w̃an w̃uh̃atdih náhninit, “Caán oyat yoobát caá”, jwĩ níj jéihna caá. Pánihna, jwiítbut w̃anna yuh̃na, jwĩ déewãdih túi oinit, teo wáacat caá náahap.* ¹⁷ Dawá bíi dée bíbohni, ã dée panihni moh yéejnidih enna yuh̃na, caandíh jĩgah en teo wáaccan, Diosdih ã oican caá. ¹⁸ Pánihna, wã weh panihnitá, “Bitadih wã oina caá”, níijná, jacjeh pohba níjcat caá náahap.

Um̃canjeh, Diosjeéh jwĩ jum̃at

¹⁹ Cãacwãdih túi oina, Dioíhwã jwĩ jum̃atdih jwĩ jéihna caá. Pánihna, ã peéh chãjat pínahdih um̃canjeh, ãjeéh jwĩ túi jum̃na caá. ²⁰ “Yéejat jíib weemdíh ã jum̃na nacaá”, jwĩ níj jenah joyóchah yuh̃na, Dios nihatdih jéihni jum̃na, jwĩ jenah joyát dihbut ã túi jéihna caá. Pánih jéihna, ãihwã jwĩ jum̃atdih jwĩ túi jenah joyát pínah níijná, jwiít dih ã teo wáac bipna caá. ²¹ Wã oinitá, “Dios wã yéejatdih át yoh tagaá”, níj jenah joinít, um̃canjeh, Diosjeéh jwĩ túi jum̃na caá. ²² Pánih jum̃nit, Dios ã w̃atdih jepahna, ã weñat pínahdih jwĩ chãjachah, caandíh dedé jwĩ w̃abát dih jwiít dih ã w̃uh̃bipna caá. ²³ Nin pah jwiít dih ã w̃atna caá: “Wã w̃uh̃ Jesucristodih túi jenah joinít, bita ãihwãdihbut ñi

* **3:16** Jn 15.13

oyoó”, ãt niijíp wut jĩ.* 24 Dios ã wuttdih táí jepahnitboó ãjeéh ĩ táí jamna caá. Dios ĩjeéhbüt ã táí jamna caá. “¿Dios wãjeéh ã jam niit?” jwĩ niij jéihíhichah, Dios jwiitdih ã wãhni Túini Espíritu “Jújũh, Dios majeéh ã jamna caá”, ã niij jéihyana caá.

4

Cristodih eníhcannitdih ded pah jwĩ jéihyat

1 Wã oinitá, “Túini Espíritu weemdih nin pah ã niij naáwát túutna caá”, niij yeenit, dawá ĩ jamna caá. Pánihna, Dios ã naáwát túutni ã jamatdih jéihyat túut niijná, ded pah ã naáwáttdih ñi táí joyoó. Dios naáwát biíc yoobó ã naóhcah, ñi joyáh bo-joó. 2 Yoobópdih Túini Espíritu ã naáwát túutni nin pah ã niij naóhbiipna caá: “Jesucristo jwiit panihni cáac jamna yuhna, Diosjeh ãt jamup wut jĩ”, ã niijbípna caá. Páant niijni Dios ã wahní ã jamna caá. 3 Obohjeéhtih, nemépwã ĩ maáh ã wahniboó, “Jesús Dios nihcan caá”, ã niijbípna caá. Páant niijni Dios ã wahní nihcan, Cristodih en jũihniíh caá. Cristodih en jũihniíhwã dawá ĩ jamat pínah doonádiñ ñitát joi tágaá. Bũũ nin baácboó dawá ĩ jamna caá.*

4 Obohjeéhtih, yeébbó, wã oinitá, Dioíhwã ñi jamuchah, Túini Espíritu ñijeéh ã jamna caá. Jesúsdiñ jepahcannit, nemépwã ĩ maáh ã wēpat chah, Túini Espírituboó ã wēpna caá. Pánihna, yeebdih ĩ yee naáwáchah yuhna, caán ã wēpatjĩh queétdih yap yohnit ñi jamna caá. 5 Queétboó Dioíhwã nihcah, ĩ bohéatbüt Dioíh nihcan caá. Bitá

* 3:23 Jn 13.34; 15.12,17 * 4:3 Mt 7.15; 2Jn 7

Dioih nihcannit, i bohéatdih i túi wēi joiná caá.*
 6 Obohjeéhtih, Dioihwā jumna, ā naáwátidih jwī bohénachah, āihwāboó jwiítidih i túi wēi joiná caá. Diosdih jéihcannitboó, jwī naáwáchah, i joíihcan caá. Pánihna, Dios naáwátidih ded yoobópdih bohéni, ded yee bohéni ā jummatdih ni jéihbipna caá.*

Dios oini caá

7 Wā oinitá, oyat wēpat Dios jwiítidih ā wūhuchah, bita āihwādih jwī oi jīh. Det bitadih túi oinit Dios weh i jumna caá. Pánih jumnitjeh Diosdih jéihnit, ājeéh i túi jumna caá. 8 Dios oini ā jumuchah, bitadih oicannit, Diosdih jéihcan, ājeéh i jumcan caá. 9 Dios ā wūh biíc jumnidih nin baácboó āt wah deyanap tajī, ā wēpatjīh Diosjeéh wēnit, páantjeh jwī jummat pínah niijná. Pánih chājna, ded pah ā oyatdih jwiítidih āt jéihyanap tajī.* 10 Oyat yoobát nin pah caá ā jumap: Diosdih jwī oyat pah nihcan, jwiítidih Diosboó ā oyat pah caá oyat yoobát ā jumap. Jwiítidih búdí oinit, jwī yéejat jīb iiguipna bejat déejidih túi ubat túut niijná, Dios ā wūhdih āt wun wūhat túutap wut jī.

11 Wā oinitá, Dios jwiítidih caan páh búdí ā oyochah, jwiítbut túi míc oyat caá náahap. 12 Nihat Diosdih encannit jwī jumna caá. Obohjeéhtih, jwī míc oyochah, Diosjeh jwījeéh ā jumna caá. Páant ā jumuchah, ā náah yacat pah ā oyatjīh bitadih jwī túi teo wáacna caá.* 13 Dios jwiítidih āih Táini Espíritudih āt wūhap taga. Páant jwījeéh ā jumuchah, “Dios biícidih wā jumna caá. Wājeéh caanbút ā jumna caá”, jwī niij jéihna caá.* 14 Jwī

* 4:5 Jn 15.19 * 4:6 Jn 8.47 * 4:9 Jn 3.16 * 4:12 Jn 1.18

* 4:13 Ro 8.9; 1Jn 3.24

Íip ã wãúhdih nin baácboó ãt cãac jummat túutup tajĩ, cãacwãdih ã túi ubat pínah niijná. Páant ã cãac jummat túutnijidih jwiítjeh jwĩ enep jĩ. Pánih ennitji, bitadiah jwĩ jéih naóhna caá.* ¹⁵ “Jesús Dios wãúh caá”, niijnjeh Diosjeéh ã túi jumna caá. Diosbut ãjeéh ã túi jumna caá.

¹⁶ Dios jwiítidih ã oyatdih jwĩ jéihna caá. Pánih jéihnit, caandih jwĩ túi jenah joiná caá. Dios nihat cãacwãdih búdí ã oina caá. Pánihna, ded bitadiah oini Dios biícidih ã jumna caá. Diosbut ãjeéh ã jumna caá. ¹⁷ Pánih Dios biícidih jumna, caandih, bitadiahbut jwĩ túi oina caá. Pánih oina, cãacwã ï yéejat jíib peéh chãjat yeó jáapdih úumcanjeh, jwĩ túi jumnipna caá. Cristo ã íip Dios biícidih ã jumuchah, jwiítbut nin baácboó jum jwuhna, biíc yoobó caán biícidih jwĩ jumna caá. Pánih jumnit, ã jwúub dei júúwúchah, jwĩ úumcan níit. ¹⁸ Ded Diosdih oini ã oyatdihbut jéihna, caandih ã úumcan níit. Pánih túi oina, jwĩ oinidih jwĩ úumcan caá. Obohjeéhtih, biíhdih úumna, caán ã peéh chãjat pínahdih jwĩ úum jenah joiná caá. Pánihna, jwĩ úumnidih jwĩ oican caá.

¹⁹ Dios jwiítidih ã oi waáwáchah, jwiítbut caandih, bitadiahbut jwĩ jéih oina caá. ²⁰ Ded ã dée panihnidih eníhcan, “Weém Diosdih wã oina caá”, niijná yuhna, ã yeena caá. Biíhdih enna yuhna, ã oican, Dios ã enca naáhdih ã jéih oican caá. ²¹ Pánihna, nin pah jwiítidih Jesucristo ã níj wutup jĩ: **“Ded Diosdih oina, ã dée panihnidihbut oyat caá náahap”**, ã niijíp jĩ.*

* **4:14** Jn 3.17 * **4:21** Mt 5.44-45; Mr 12.29-31

5

Dios weh yéejatdih ï yap yohat

¹ Det Jesúsdih “Dios ã wahni Cristo caá”, ni-ijnít, Dios weh ï jumna caá. Det jwĩ íp Diosdih táí oinit, ã wehdihbut ï oina caá. ² Diosdih oina, ã wuatdih jepahnit, ã wehdihbut jwĩ oyat yoobópdih ã jummatdih jwĩ jéihna caá. ³ ã wuatdih jepahnajeh, Diosdih jwĩ táí oina caá.* Caandih oina, jwiít dih ã wuat wái náah jumni nihcan caá.* ⁴ Det Dios weh jumna, yéej chãjatdih ï jéih yap yohna caá. Jesucristo ã wēpatdih táí jenah joiná, Diosdih jéihcannit ï jenah joyát pah, jwĩ jenah joicán niít. ⁵ “Jesús Dios wũúh caá”, niij jenah joiníjeh yéejatdih náahcan, ã yap yohna caá.

Dios wũúh ded pah ã jummat

⁶ Jesucristo nin baácboó ãt cãac jumup tajĩ. ã tewat pínah jãtjih, Juan Daabánidih ã daabáát túutup jĩ. Túttimah, cruzboó wan wũhna, ãih meépdih ã yohop jĩ. Pánihna, mahjĩh ã daabáát dih, cruzboó ãih meép ã yohatdihbut náhninit, Dios wũúh ã jummatdih jwĩ jéihna caá. Túini Espíritubut “Nin Dios wũúh tigaá”, jwiít dih ã niij jéihyana caá. Caán Túini Espiritu yeecan, yoobópdih naóhni caá. ⁷⁻⁸ Pánihna, Jesús Dios wũúh ã jummatdih nit biíc peihcannit jéihyanit ï jumna caá: Túini Espiritu jwiít dih ã jéihyanachah, mahjĩh ã daabáátjidih, ãih meép ã yohatjidihbut jenah joinít, Jesús Dios wũúh ã jummatdih jwĩ jéihna caá. ⁹ Cãacwãjeh ï naáwáchah joiná, “Caán yoobópdih tigaá”, jwĩ ni-ijná caá. Páant niijnít dih jwĩ joiná yũhna, jwĩ

* 5:3 Jn 14.15; 2Jn 6 * 5:3 Dt 30.11; Mt 11.30

íp ã wũúhdih naóhna, cãacwã ï naáwát chah ã jumachah, caánboodih túi joyát caá náahap.* ¹⁰ Dios wũúhdih ded túi jenah joiní “Jesús Dios wũúh ã jummat dooná yoobópdihi tigaá”, ã niij jéihna caá. Obohjeéhtih, Dios ded pah ã wũúhdih ã naáwát dihi joyáh bojni “Dios yeeni caá”, ã niijná caá. ¹¹ Nin pah Dios jwiít dihi ã niij jéihyana caá: “Wã wũúhdih túi jenah joinít, páantjeh wãjeéh ñi jummat bipna caá”, ã niijíp jĩ. ¹² Dios wũúh Jesúsdih ded túi jenah joiní, Diosjeéh páantjeh ã jumna caá. Obohjeéhtih, ded Jesúsdih jepahcanni, Diosjeéh ã jumcan niít.*

Juan ã pée naáwát

¹³ Yeéb Dios wũúhdih túi jenah joinít dihi naóh daácna caá wã chãjap, páantjeh Diosjeéh ñi jummat pínah dihi ñi jéihyat pínah niijná.*

¹⁴ Dios ã náahat pah caandih jwĩ úbúchah, jwiít dihi ã joyát dihi jwĩ túi jéihna caá. Pánihi jéihna, úmcanjeh caandih jwĩ úbhna caá. ¹⁵ Páant ã joyát dihi jéihna, “Wã úbát dihi át wũh tagaá”, jwĩ niij jéihna caá.*

¹⁶⁻¹⁷ Yeéb ñi dée panihni ã yéej chãjachah ennit, Diosdih ñi úbú, ã yéejat jíib caandih iiguípna ã wahcat pínah niijná. Páant ñi úbúchah, Dios caandih ã túut numbípna caá, ãjeéh páantjeh ã jummat pínah niijná. Obohjeéhtih, ded Cristodih páantjeh náahcan, yap yohnit, áihwá dihi bat eníhcan, iiguípna ã bejbipna caá. Pánihni boodih ñi úbát pínah dihi wã wutcan caá. Nihat yéej chãjat Diosdih yap yohat míic caá. Obohjeéhtih, biíh yéej chãjat

* **5:9** Jn 5.32-37; 8.18 * **5:12** Jn 3.36 * **5:13** Jn 20.31 * **5:15** Mt 7.7-11; Lc 11.9-13; Jn 15.7,16; 16.23-24; 1Jn 3.21-22

iiguípna ã bejat tútcan caá. Pánih chãjnitdih caá úúbat náahap, ã tút nuumát pínah niijná.

¹⁸ Dios wááh Jesús áihwãdih ã túi en daoná caá, nemépwã ã maáh queétdih ã yéejacat pínah niijná. Pánihna, “Dios weh páantjeh ã yéej chãjcan caá”, jwĩ niij jéihna caá. ¹⁹ “Jwiitboó Dioíhwã jwĩ jumna caá. Obohjeéhtih, nihat Diosdih náahcannitdih Satanás caá ã wutup”, jwĩ niij jéihna caá. ²⁰ “Dios wááh nin baácboó cãac jumnit, Dios yoobãtdih jwĩ jéihyat pínah niijná, jwiitdih ã jéihyanap jĩ”, jwĩ niij jéihna caá. Pánihna, Diosjeéh túi jumnit, ã wááh Jesucristojeéhbüt jwĩ túi jumna caá. Jesucristo Dios yoobát jumna, páantjeh Diosjeéh jwiitdih ã túi jummat túttna caá.* ²¹ Wã weh panihnitá, jñi túi chãja chaáh! Pãpnidih ñi wëi úúbhca bojoó.

Páant bóojeh tigaá wã naáwát.

Juan

* 5:20 Jn 17.3

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022
34c9543b-57a6-5290-ab7b-4fa15529a7e2